

331
801
Q U Æ S T I O M E D I C A.

QUODLIBETARIIS DISPUTATIONIBUS
manè discutienda in Scholis Medicorum
die Jovis 19. Novembris.

M. JOANNE POISSON, Doctore
Medico, Præside.

An Bilis præcipua vis in amarore?

I.

QUEM habent usum in machinis hydraulicis aqua & in pneu-
maticis aer, eundem in corpore humano spiritus & hu-
mores obtinent. Hi varii sunt variæque indolis, omnes in
sanguine permixti & confusi ab eo perenniter secernuntur & ef-
fluunt in propria vasa, in ipsa (modo sint utiles) refluxuri, ut
succus pancreaticus, bilis, limpha: nusquam redituri si prorsus ex-
crementitii fuerint, qualis urina variique succi per arterias mesen-
tericas ad intestina delati, una cum chyli fæce per anum exēnen-
di. In humorum utilium exquisita permixtione & æquabili ad se
invicem proportionem quam ne conjecturis quidem assequi pos-
sibile est, laudabilis temperies consistit; hanc consequuntur cal-
oris & frigoris humiditatis & siccitatis temperatio. Cum ab
ejusmodi exacta mixtione & legitima proportionem recedunt, fit
intemperies; unde caloris aut frigoris, humiditatis aut siccitatis
molestus excessus. Præpostere philosophantur qui rem secus ac-
cipiunt. Non à calore aut frigore, humiditate aut siccitate hu-

2

moribus inest insignis Facultas. Præcipua vis debetur saporibus.

I I.

SAPORUM nomine hîc linguæ sensus ne intellexeris, sed causas à quibus motu nervorum linguæ excitantur. Hæ, salia sunt in humore fusa vel oris salivâ dissoluta. Tot salia tot sapores. Simplicia sunt vel composita. Simplicia duo tantum, alterum acidum ὄξύ Hippocrati; alterum alkali vocant. Acida salia non unius sunt generis & indolis, omnia cum oppositis effervescent, non secum invicem, excepto spiritu salis qui cum aliis acidis ebullit. Sal pariter alterum non uniusmodi est, aliud fixum, aliud volatile. Omnia vires acidorum infringunt ut & ab ipsis infringuntur. Ab eorum secum invicem & cum principiis passivis terra scilicet & aqua, variâ mixturâ varii sapores in quorum aliis acidum dominatur, ut in salso, austero, acerbo, in aliis alterum ipsi oppositum ut in acri & amaro. In Mineralibus, plantis, animalibus, generatio, corruptio, alteratio, mutationes fere denique omnes, horum salium ministerio, dum permiscuntur aut secernuntur, effervescent vel concrescunt, aculeis pungunt, vel demulcent lævitate, perficiuntur.

I I I.

PUTIDUM liquamen quod in alvi fluxu, vel purgantium medicamentorum vi excernitur, bilis nomine male insignitur. Hæc liquor est pretiosus in propriis conceptaculis ad suos usus coacervatus, naturâ suâ constanter amarus. Ex chylo primum unâ cum aliis succis sanguineum constituentibus in corde gignitur. Ad hepatis arteriarum ramulos à cæliaca productos advehitur, & in eo à sanguine cui huc usque permixta fuerat, seceratur. Hoc viscus quamvis ad sensum integrum, glandula est conglomerata, plurimis constans lobulis tenui membrana involutis & à se invicem distinctis. Unusquisque lobulus ex pluribus compositus glandulosus acinis, uvam referre videtur. Ad singulos lobulos venæ cavæ, venæ portæ, arteriæque rami & canalis bilarii radices pari numero disperguntur. Istis lobulis tanquam cribris bilis trajicitur & in radices canalis bilarii excutitur, indeque in canalem. Ab hepatis substantia ad vesiculam folliculumve bilis obscurior via:

Quominus à canali in Vesiculam³ fluat obstant valvulæ ejus cervici citrà meatus còlidoci hiatum appositæ. Bilis vesiculæ tenuior est, canalis crassior, utraque comuni ductu in jejunum intestinum delabitur.

IV.

BILIS amaror à plurimo sale volatili, paucò acido, terrâ & aquâ certâ proportionè permixtis producitur. Sal volatile dignoscitur, tum ex ejus analysi per ignem factâ, tum ex permixtione cum spiritibus acidis quibus cum etiâ extrâ corpus effervesceat. Paucum saltem acidum demonstrat salis volatilis permanens, quod nusquam solum subsisteret sed promptissimè in auras evanesceret. Istius acidì exuperantiâ bilis concrevit, undè lapidum in vesiculâ fellis origo. Si minori fuerit copiâ quàm par est, bilis fit acrior & subtilior. Ad intestinum delata chyloque & succo pancreatico permixta pro variâ suâ indole effervescentiâ parit laudabilem vel molestam, quam vitæ commoda vel incommoda sequuntur. Hac effervescentiâ chyli fœces præcipientes aguntur in intestina crassa. Uterius cum chylo ad cor promota bilis iterum effervesceat in ejus ventriculis, atque pro amari sui salis naturâ varios producit effectus, hos inter notissimus calor qui juxta fermentationis modum, naturalis est vel contrâ naturam.

V.

CALOR & frigus in corpore Facultates sunt omnium minime potentes; præcipuè viribus magis insignes sunt acidum, amarum, salum, austum, acerbum, quorum unum quodque homini inest. Quandiu hæc temperata sunt inter se neque conspicua sunt, neque hominem lædunt. Ubi horum aliquid secretum fuerit, atque ipsum in se ipso fuerit, tunc conspicuum est & hominem lædit. Ex cibis quicumque ingesti incommodi sunt, horum unusquisque amarus est, aut salus, aut acidus, aut acerbior, aut acerbior, aut quacumque simili ratione intemperatus ac fortis. His saporibus in excessu positis salibusve nocent, non calore aut frigore quæ actu non in sunt, sed salium motum consequuntur. Falluntur qui propter calidum, hominem febricitare putant. Rectè judicant, qui propter amarum, acidum, salum,

4

acre. Bilis extrà naturæ suæ Cancellis posita calore suo non lædit
sed amarore, qui ubi per corpus diffusus est, statim & anxietates
& æstus, & impotentia occupant. Ubi acrior ac æruginosa bilis
facta est, statim, morsus viscerum & pectoris, rabies & despe-
ratio.

Ergo Bilis præcipua vis in amarore.

Domini Doctores disputaturi.

M. Petrus Bonnet.

M. Joannes-Baptista-Renatus
Moreau.

M. Nicolaus Pelletier.

M. Renatus le Comte.

M. Franciscus Afforty.

M. Nicolaus de Jouvanci.

M. Raphaël Maurin.

M. Petrus Cresté.

M. Alexander-Michaël
Denyau.

Proponebat Parisiis PETRUS GAMARE, Parisinus,
Baccalaureus Medicus. A. R. S. H. 1682.

Apud Franciscum Muguet, Regis & Facultatis Medicinæ Typographum.